

«Jau vegn betg a midar domicil»

Partida populara svizra dal Grischun

DA GION NUTEGN STGIER / ANR

■ **Defender il sez da cusseglier naziunal Heinz Brand, almain far tantas vuschs da partida sco tar las elecziuns dal 2011, sche betg anc augmentar quellas: Quai èn duas da las finamiras da la pps grischuna per las tschernas naziunalas en sis mais.** In interess da medias sco pac vesì a Cuir tar ina conferenza da pressa d'ina partida politica da noss chantun. Envidà a quella aveva la pps dal Grischun ed ils schurnalists da l'entira Svizra èn vegnids en rotschas. La raschun per quest grond interess da las medias era la candidatura da *Magdalena Martullo-Blocher*, per las tschernas dal cussegl naziunal. La scheffa da l'Ems Chemia è cun *Heinz Brand*, l'actual cusseglier naziunal, ina da quellas persunalitads da la pps da noss chantun che duess persvader votantas e votants d'eleger candidatas e candidats da la pps per il cussegl naziunal.

Ina giada dapli libertad ed independenza

La pps vegn er en il futur a s'engaschar per la libertad e l'independenza da la Svizra, ha ditg *Andrea Davaz*, il vicepresidente da la pps grischuna. Ultra da quai duai ella er dar a Berna dapli impurtanza al basegn ed als giavischs dal Grischun. Cun persunalitads sco *Magdalena Martullo-Blocher* e *Heinz Brand*, dentant er cun ils ulteriurs otg fermes candidats e la candidata, saja quai er realistic, ha ditg *Andrea Davaz*. L'energia, l'agricultura, il turissem e la politica da traffic, quai sajan temas impurtants er ord visita da noss chantun. L'avegnir da la Svizra dependa be da la politica che vegn fatga a Berna e cunzunt er da la politica da la pps.

Adina damain cumpetenzas

Chantuns da la periferia sco il Grischun hajan en summa betg simpel da chattar en il parlament naziunal atenziun, ha ditg *Magdalena Martullo-Blocher*. Quai less ella midar cun represchentar noss chantun en il cussegl naziunal. L'actuala politica federala patescha da preschent cunzunt en ils dossiers da las cunvegns bilaterals, da l'energia, da las taxas e da la politica da furmazion, pervia d'enconuschientschas superficialas e decisiuns memia pauc ponderadas, ha ditg *Magdalena Martullo-Blocher*. En il parlament a Berna mancan impressaris cun experientscha internaziunala adina dapli, uschia ch'ella less er qua dar ina cunterpausa. Cun esser savens a Domat, cun esser la pli gronda patruna en noss chantun e cun avair a Lai ena chasa da vacanzas stettia il Grischun politicmain ad ella il pli manivel. Quai saja ina da las raschuns da sia candidatura per il cussegl naziunal e quai per noss chantun. En cas dad ina elecziun en il cussegl naziunal vegna ella tuttina betg a midar domicil da Meilen en in lieu en il Grischun, quai cunzunt pervia da motivs professiunals, ha ditg la primcandidata da la glista «M» da la pps grischuna.

Reacziuns dals president da fracziun

E co han ils schefs da fracziun da las autras quatter partidas da noss chantun, la pcd, la pld, la bdp e la ps reagì cun sentir da la candidatura da *Magdalena Martullo-Blocher*? È eventualmain ina colliaziun da glista cun la pps grischuna tar las elecziuns dal cussegl naziunal gia ussa istorgia?

Marcus Caduff, il schef da fracziun da la pcd, ha manegià che sia partida haja avunda buns candidats dal Grischun e cunzunt era che represchentan l'entira



Magdalena Martullo-Blocher en discussiun cun schurnalists.

FOTO G. N. STGIER

populaziun e betg mo ina interpresa. Ina colliaziun da glista cun autras partidas vegnia a decider la direcziun da la pcd, dentant la probabilitad d'ina colliaziun da glista cun la pps saja plitost improbabla ed era gia avant la candidatura da *Magdalena Martullo-Blocher* uschia. *Rudolf Kunz*, il schef da fracziun da la pld, ha ditg che la fracziun haja piglià cunaschientscha da quella candidatura, dentant en moda ruassaivla. Segir saja positiv sch'in interpretider sa mettia a disposiziun per ina candidatura. Aregu-

ard ina colliaziun da glista vegna a decider la direcziun da la pld ed ussa er analizar da nov la situaziun. Per *Gian Michael*, il schef da fracziun da la pbd, è la candidatura da *Magdalena Martullo-Blocher* ina giada dapli ina conferma che la pps da noss chantun saja adina pronta per ina surpraisa. El saja bain stà surstà da quella candidatura. Sch'ella s'engascha lura a Berna per ils basegns dals chantuns da muntogna, quai craia el betg. Quai che pertutga ina colliaziun da glista cun autras partidas saja anc betg

decidi, ha ditg *Gian Michael*. Er *Andreas Thöny*, il schef da fracziun da la PS, ha ditg che en princip possa mintgin che abitescha betg en il Grischun candidar per noss chantun sco cusseglier naziunal. Votantas e votants hajan lura da sa decider per l'isolaziun cun ina candidatura da Turitg, ubain per ina politica cun ina tscherta rait ed averta. Cun ina colliaziun da glista cun la pps han las autras partidas burgaisas da quintar che la pps è da nov represchentada a Berna cun dus sez, accentuescha *Andreas Thöny*.